



Skýrsla æskulýðsnefndar Blæs

2022-2023



Í æskulýðsnefnd Blæs 2022-2023 sitja Þórhalla Ágústsdóttir æskulýðsfulltrúi, Rósa Dögg Þórsdóttir, Anna Bergljót Sigurðardóttir, Margrét Linda Erlingsdóttir, Sigríður Margrét Guðjónsdóttir, Sigrún Þorsteinsdóttir og Heiðrún Þorsteinsdóttir.

Í Blæ er lögð áhersla á að halda uppi virku og öflugu æskulýðsstarfi enda er það grunnurinn að framtíð félagsins. Reynt er að hafa sem flesta viðburði á vegum félagsins við hæfi allra aldurshópa og brúa kynslóðabilið sem víðast. Félagstaðan okkar er orðin afar góð og býður upp á stórbætta möguleika til æskulýðsstarfs.

Hestakrakkar voru með mánaðarlega hittinga og var mætingin góð. Þar var margt brasað og fléttað saman fræðslu og leik. Sýnikennsla, fræðsluerindi, bíó, hestanamigerð og fleira var á dagskrá. Hestakrökkum lauk í maí með glæsilegri gistigleði inni í reiðhöll þar sem var farið á hestbak, og samverunnar notið

Reiðnámskeið voru á dagskrá vetrarins þar sem kennt var í helgarlotum. Félagið greiddi námskeiðið verulega niður fyrir æskulýðinn og er markmiðið að sem flestir geti verið með.

Æskulýðsdagar eru í raun hápunktur æskulýðsstarfsins og voru að þessu sinni haldnir 8.-11. júní á félagssvæði Blæs í blíðskaparveðri. Æskulýðsdagar hafa lengi verið árviss atburður í félaginu og á undanförunum árum hefur þátttakan verið jöfn og góð. Í ár tóku 20 hressir krakkar á aldrinum 5-16 ára þátt í æskulýðsdögum. Anna Sonja Ágústsdóttir var reiðkennari þetta árið og fórst það mjög vel úr hendi. Trek var viðfangsefnið að miklu leyti og gekk mjög vel bæði hjá hestum og knöpum. Æskulýðsdagar eru settir á fimmtudagskvöldi og síðan er sleitulaust fjör fram á sunnudagskvöld. Þó hestamenska og fræðsla tengd henni sé í fyrirrími á þessum dögum þá er ýmislegt fleira sér til gamans gert s.s. farið í sundferðir, leiki, sungið, haldnar kvöldvökur, farið í gönguferðir, óvissuferðir og grillað. Listasmiðjur voru alla dagana þar sem unnið var með hestatengd þemu, unnið var af mikilli gleði að skemmtiatriðum fyrir kvöldvöku, hópefli og fræðsla var meginþemað fyrsta kvöldið, og hestasnyrting og reiðtygjaumhirða var á sínum stað. Síðasta daginn var slegið upp skrautsýningu þar sem stoltir knapar léku listir sínar og sýndu árangur námskeiðsins. Það skapast alltaf ótrúlega góð stemmning á æskulýðsdögum og reglurnar eru einfaldara: Allir eru vinir og við pössum öryggið. Æskulýðsnefndin og félagar úr Blæ vinna mikla sjálfboðavinnu á æskulýðsdögum, t.d. þarf að sjá um matinn, allt hópastarfið, vera með í reiðtúrum og gæta krakkanna á nóttunni, flytja þá í sund og á aðra viðburði sem fram fara utan hestasvæðis, auk þess að sjá um allan undirbúning. Krakkarnir dvelja á félagssvæðinu meðan á æskulýðsdögum stendur, í tjöldum ef veður leyfir en annars í félagshúsi Blæs. Öllum krökkum sem geta útvegað sér reiðskjóta er heimil þátttaka á æskulýðsdögum og þátttökugjald er ekkert. Æskulýðsnefndin reynir af fremsta megni að vera þeim innan handar sem vilja vera með en gengur illa að finna reiðskjóta og Hestaleigan Skorrahestar á heiður skilinn fyrir sitt framlag til æskulýðsdaga gegnum árin en þau hafa bæði lánað heilmarga hesta og unnið ærið sjálfboðastarf. Þetta árið voru þau sjálf með stóran hóp og sá því aðeins á fjöldanum hjá okkur. Á æskulýðsdögum var hluti hópsins að stíga sína allra fyrstu skref í hestamenskunni en aðrir voru lengra komnir. Aldursbilið virðist alltaf þurrkast algjörlega út á æskulýðsdögum og þar myndast með góðu utanumhaldi þéttur og skemmtilegur hópur þar sem allir hjálpast að og deila yndislegum upplifunum í samveru við hestana sem eru að sjálfsgöðu kjarninn í öllu saman. Það er alltaf ótrúlega gaman að fylgjast með framförunum sem verða hjá krökkunum á æskulýðsdögum þar sem þau eru allan daginn í reiðtímum, reiðtúrum og hópastarfi tengdu hestum, sjá þetta einstaka samband sem skapast milli hests og knapa og þarna

kviknar sannarlega áhugi hjá mörgum sem annars fengju ef til vill ekki tækifæri til að kynnst hestamennsku.

Til starfsins þetta árið naut æskulýðsdeildin góðra styrkja, aðallega frá SÚN og Spretti. Það er ómetanlegt fyrir okkur að eiga góða bakhjarla og gerir það að verkum að framboð viðburða verður mun fjölbreyttara og hægt er að auka möguleika allra á að kynnst og stunda hestamennsku.

Í æskulýðsstarfinu er oft erfitt að finna góðan tíma til samverustunda og námskeiðahalds vegna þess hversu upptekið unga fólkið er í öðrum íþróttum. Við reynum þó að finna út hvað hentar hverju sinni og leitumst við að styðja sem best við bakið á þeim eru virkir auk þess að laða til okkar nýja áhugasama félaga sem geta haldið starfinu okkar gangandi.

Með bestu kveðju

Æskulýðsnefnd Blæs

